



ज्वजलपा वाःपौ

JWOJALAPA NEPALBHASA WEEKLY

वै ६ ल्या: ४३ (पूर्णडक १५) ने. सं. ११३६ बछुलाथ्व नवमि आइतवा: २०७३ जेठ २ गते आइतवार (May- 15, 2016)

मू ८।-

आन्दोलनकारीपाखें बालुवाटार कब्जा यायेगु ख्याच्च:



३ घण्टा काठमाण्डौं कब्जा जूगु दावी, ध्वाँय् लाकाकाल, प्रहरीलिसे धित्तुधिन

ज्वजलपा वा:पौ /

समानुपातिक समावेशी, जाती भाषाया ख्यलय् समानता, संघीयता, पहिचानया आधारय् प्रदेश निर्माण यायेमा:गु नापं थीथी कथंया माग तथा आन्दोलनय् क्वहां व:गु संघीय गठबन्धनया नेतातय्सं सिंहदरवार घेराउ याना जक मगात धा:सा थ:पिन्सं बालुवाटार कब्जा यायेगु जुइ धका: ख्याच्च: बियादीगु दु ।

संघीय गठबन्धनया कजि नापं संघीय समाजवादी फोरम नेपालया नाय: उपेन्द्र यादव उगु कथंया ख्याच्च: जेठ १ गते बियादीगु ख: । वैशाख ३१ गते पत्रकार सम्मेलन याना वर्तमान राज्यसत्ता नश्लवादी व प्रतिगामी ख: धका: द्वपं बियादीमह नेता यादव जेठ १ गतेया येंय् जनप्रदर्शनया भ्बलय् अथे बालुवाटार कब्जा यायेगु ख्याच्च: बियादीगु ख: । थ:पिन्सं न्ह्याकागु पहिचानवादी आन्दोलनयात अन्तर्राष्ट्रियपाखें नं समर्थन या:गु उल्लेखयासैं वय्कलं ओली सरकारयात जनताया समर्थन मदु धका: तकं धयादिल । मधेस विद्रोहलिपा आ सिंहदरवार घेरे यायेत नेपा:मि जनतात स्वनिलय् थ्यंक: वये धुकूगु दु धका: तकं धयादिल ।

येंया शान्ति वाटिकापाखें शनिवा: सनिलया साढे ३ बजे जुलुस सुरु जूगु ख: । जुलुस भच्चा न्ह्या: वनेवं हे स्वम्ह डिएसपीया नेतृत्वं जुलुसयात खुल्लामञ्च जुया वीरअस्पतालपाखे वनेगु लँ क्यंगु ख: । सशस्त्र व जनपथ प्रहरीया बलं नं पनेत कुत: या:गु ख: । तर आन्दोलनकारीपाखें संघीय समाजवादी फोरमया सहअध्यक्ष राजेन्द्र श्रेष्ठ न्ह्या: वनेवं प्रहरी व आन्दोलनकारीया दथुइ धित्तुधनेगु ज्या जूगु ख: ।

सुरुइ हे प्रहरीया घेरा त्वा: थलेगु ज्या आन्दोलनकारीतय्सं यायेवं हे सहिदगेट तक ब्वाँय् वना प्रदर्शन या:गु ख: । अनं लिपा लुँहिति, न्यूरोड, वंघ: जुया थमेलय् थ्यंका: सभा जूगु ख: । जुलुस सुरु जुसानिसैं थ:पिन्सं थ्यंमथ्यं ३ घण्टा तक काठमाण्डौं कब्जाय् कयागु ख: धका: तकं आन्दोलनकारीतय्सं दावी या:गु दु । जेठ २ गते सिंहदरवार घेरे यायेगु नितिं प्रचारया ल्याखं अथे शनिवा: जुलुस

प्रदर्शन या:गु ख: । संघीय समाजवादी फोरम नेपाल, तमलोपा, फोरम गणतान्त्रिक, जनजाति पार्टी, लिम्बुवान पार्टीनिसैं थीथी राजनीतिक पार्टी अले आदिवासी जनजाति राष्ट्रिय आन्दोलननिसैं नेवा: स्वायत्त राज्य मंका: संघर्ष समिति नापं याना निगू दर्जनं मल्याक पार्टी व मोर्चात जाना अथे आन्दोलन या:गु ख: । पहिचान पक्षधर धका: संघीय गठबन्धन दयेका या:गु आन्दोलनया भ्बलय् शनिवा:या प्रदर्शन या:गु ख:सा प्रदर्शनय् सहभागी जुइत वयाच्वंगु किरात राज्य जनसंघर्ष समितिं प्रयोग या:गु किरात राई यायोक्खाया थ्यंमथ्यं निस:गू ध्वाँय् वानेश्वरय् प्रहरीं लाकाका:गु दु । गाडीइ हयाच्वंगु अवस्थाय् अथे ध्वाँय् प्रहरीं लाका का:गु ख: धका: धा:गु दु । सिंहदरवार घेरे यायेगु ज्याभ्बलय् सहभागी जुइगु नितिं तराईया मधेसीत, हिमालया जनजातिनिसैं पहाडया जनजातित तकं येंय् थ्यंक: व:गु दु । जिल्ला जिल्लापाखें ढलंढमह नेता व कार्यकर्तात येंय् व:गु दुसा नेवा:तय्त नं सतकय् क्वकायेगु नितिं छुं दिं न्ह्य:निसैं नेवा: स्वायत्त राज्य मंका: संघर्ष समितिपाखें येंया त्वा: त्वालय् प्रचारात्मक सभा या:गु ख: । थुगुसीया आन्दोलनय् सरकारं दमन यात धा:सा उकिया प्रतिकार यायेगु जुइ धका: तकं संघीय गठबन्धनं ख्याच्च: बिया वयाच्वंगु दु ।



संघीय गठबन्धनया नारा

थीथी राजनीतिक पार्टीनिसैं थीथी मोर्चा जाना न्ह्याकूगु आन्दोलनया भ्बलय् सतकय् थीथी कथंया नारा नं थ्वयेकूगु दु ।

विशेष याना प्रतिगामी संविधान विरुद्ध काठमाडौं केन्द्रित धा:गु आन्दोलनया कथं शनिवा: रत्नपार्कया शान्तिवाटिकाय् मुना:- विद्युत प्राधिकरण- भद्रकाली- सहिदगेट- न्यूरोड- जुद्ध शालिक- इन्द्रचोक- असन- बाङ्गेमुढा- र्थहिति जुया: थँवहिल चोकय् सभा याना: क्वचाय्कूगु दु ।

उगु जुलुसय् थीथी जिल्लां व:पिं राजनीतिक पार्टी व मोर्चाया कर््याकर्तातय्सं नारावाजी या:गु नाप नापं थ:थ:गु कथंया ध्वाँय् ज्वना प्रदर्शन या:गु ख: ।

जेष्ठ २ गते - सिंहदरवार घेराउ याइगु ज्याभव: दु । उगु आन्दोलनया नारात थथे दु ।

१. प्रतिगामी संविधान मानय् यायेमखु - मानय यायेमखु
२. पहिचान सहितया सङ्घीयता त्व:तेमखु - त्व:तेमखु
३. हाकुबंजा: व भ्रष्टाचारीयात कारवाही या - कारवाही या, कारवाही या ॥
४. डिजेल, पेट्रोल व ग्याँस उपलब्ध या - उपलब्ध या, उपलब्ध या ॥
५. भूकम्प पीडितयात पुन:स्थापना या - पुन:स्थापना या, पुन:स्थापना या ॥
६. आन्दोलनकारीत नाप या:गु सम्झौतात लागु या - लागु या, लागु या ॥
७. नश्लवादी सरकार मुर्दावाद- मुर्दावाद, मुर्दावाद ॥
८. सङ्घीय गठबन्धन जिन्दावाद- जिन्दावाद, जिन्दावाद ॥
९. वीर सहिदपिं अमर जुइमा - अमर जुइमा, अमर जुइमा ॥
१०. जिमिगु आन्दोलन जारी दु - जारी दु, जारी दु ॥



झजलपा वाश्यो

सल्लाहकार
श्रीकृष्ण महर्जन
प्रकाशक:

नजरराम महर्जन
सम्पादक

श्रीकृष्ण तण्डुकार
ले-आउट:

ज्वजलपा डेस्कटप
संवाददाता

भरत महर्जन, निरजमान सिंह
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : kirtipur_sandesh@live.com

सम्पादकिय

संघीय गठबन्धनया आन्दोलनयात वेवास्ता यायेमज्यू

तराईल्य आन्दोलन यांना वयाच्विं मधेशी मोर्चा व पहाडया आदिवासी जनजाति नापं पहिचान पक्षधर थीथी पार्टीत जाना: गठन या:गु संघीय गठबन्धनं राजधानी केन्द्रीत आन्दोलन सुरु या:गु दु । थ्वहे आन्दोलन कथं म्हिग: शनिवार शान्तिवाटिकाय् मुना: यें दैय् चाहिला आमसभा नं यात । थौं सिंहदरवार घेरय् याइगु ज्याभव: दु ।

तराई व पहाडया जिल्ला जिल्लां मनूत येंय् वयाच्वंगु दु । सरकार सुरक्षा व्यवस्था नं तचकं कडा यानाच्वंगु । आन्दोलनय् व्ययेकेत ह:गु ध्वाँयतकं लाका: कयाच्वंगु दु । छगू कथं सरकारं मुठभेडया तयारी यानाच्वंगु दु । आन्दोलनकारीतसें शान्तिपूर्ण धर्ना धयाच्वंगु दुसा सरकार नं शान्तिपुर्वक हे इमिगु कार्यक्रम न्ह्याके विइमा: । सिंहदरवार घेराउ कार्यक्रमय् शक्ति प्रयोग यात धा:सा थ:पिन्सं नं उकिया सशक्त प्रतिकार यायेगु धका: आन्दोलनकारीतसें घोषणा यायेधुंकूगु दु ।

सत्ताधारीतसें न्ह्यावलें जनताया आन्दोलनयात बलप्रयोग याना: क्वत्यलेत स्वइगु नेपा:या राजनैतिक आन्दोलनय् स्वया: वयाच्वनागु ख: । २०४६/०४७ सालया आन्दोलन जुइमा या २०५२या माओवादी जनयुद्ध जुइमा: न्हापांला सत्ताधारीतसें कुम्चा खना: दबय् यायेत स्व:गु हे ख: । गुलि गुलि दमन जुल उलि उलि आन्दोलन त:च्वया वन । अथे हे थ्व संघीय गठबन्धनया आन्दोलनयात नं दमन यायेगु मस्व:से आन्दोलनकारीत नाप वार्ता याना समस्या समाधान यायेगु हे सत्ताधारी पक्षया बुद्धिमता जुइ । मखुसा थुकिं बांमला:गु लिच्व: नं पिदनेफु ।

साहित्य/चिनाखं

हाईकू शौरभ शाक्यया

शौरभ शाक्य

खप

६७. भंडा फरर
राधा कृष्ण गोविन्दे
माघ महात्मय ।
६८. ई ताजुब चा
गप:स्वताक तिया
थौया विद्रोह ।
६९. फुस्लुग चिकं
कुं जक ल्होयाच्वन
मच्या:गु मुस्यां ।

७०. नाकाबन्दी नं
अभाव चक्रव्यूह
धापय् जिन्दगी ।
७१. दापूछ व जि
सर्ग व पाताहाक
मतिना कापू ।
७२. पुसा ह्वलेवं
सिर्जना आलाउलु
सरासु ज:या ।

छु किपूमितसें पृथ्वीनारायण शाहया न्ह्योने आत्मसमर्पण या:गु हे ख:ला ?



-नजरराम महर्जन

थौंकन्हय् बाघभैरव मन्दिर परिसरय् विकास निर्माणया ज्या द्रुतगति जुयाच्वंगु दु । मन्दिर परिसरया पूर्वपाखे कलात्मक ध्वाखा दयेकेगु लागि ज्या जुयाच्वंगु दु । अथेहे न्ह्योने फल्चा नं न्हूकथ दयेका च्वंगु दु । निगू योजनाया नं नक्सा च्वया धेवाया लागत नापं फ्लेक्स बोर्डय् तया:त:गु दु । थ्व खनां मन भतिवा लयताल । आ: बाघभैरव परि सर बांलाइगु जुल । किपूमितय्गु म्हासिका, किपूमितयगु आजुघ:या थाय् बांलाकेगु ज्या यानाच्वंगु लसताया खँ जु हे जुल । दुने चाहिला बाघभैरव दर्शन याना: पिहाँवयेत मू ध्वाखापाखे वया ।

बाघभैरव मन्दिरया ध्वाखा फुसय् ह्याउँगु पृष्ठभूमि तुयूगु आखलं च्वया छगू फ्लेक्स बोर्ड तया:त:गु खना । छु ख: धका: बांलाक ब्वना स्वया ।

धुं बहा: गुँदे महास्थान, व्याघ्रेश्वर भैरव मन्दिर, उकीला बाघभैरव मन्दिर या म्हासिका खय्भाय् व अंग्रेजी भासं च्वयात:गु जुयाच्वन । उकी थथे च्वयातल स्थापना- नेपाल सम्वत २१९-२४६ अर्थात थ्व मन्दिर दयेकेत २७ दँ लगय् जुल धा:गु जुइमा या ने.सं.२१९ निसं २४६ तकया दुने स्थापना जूगु जुइमा धया:त:गु ख:ला ? संस्थापक -शिवदेव तृतीय अर्थात शिवदेव तृतीय धा:म्ह जुजुं पलिस्था या:गु धया:त:गु जुइमा । यदि थथे ख:सा थ्व गलत ख: । बाघभैरव ग बगलें सुनां पलिस्था अर्थात स्थापना यात धइगु गनं हे उल्लेख मदु । जिं स्यूकथं शिवदेव तृतीयं बाघभैरव बांलाकूगु जक ख: धइगु ब्वनातयागु व न्यनातयागु ख: ।

अले थ्व थाय् गुलि उचाइल्य दु धका: नं च्वयात:गु दु । थ्व थाय् समुद्र सतह स्वया १४०५ मिटर च्वयला: । थुकिया क्षेत्रफल ५० बाई ३० मिटर च्वयात:गु दु ।

अले थ्व मन्दिर गबले गबले जिर्णोद्धार जुल धका: नं तयात:गु दु । व थथे दु, नेपाल सम्वत ६३५, ने.सं.९२३, ने.सं.९४७, ने.सं.१०८७, ने.सं.११२६, ने.सं.११३२ थुपिं छुं शिलापत्र वा अभिलेखय् दुथ्यानाच्वंगु जुइमा: । थथे आ:तक खुक्व: जिर्णोद्धार जुइधुंकूगु दु । थथे न्हापांगु जिर्णोद्धार व निक्व:गु जिर्णोद्धार अवधि थ्यंमथ्यं स्वस: दँ पा: , अथे हे निक्व:गु जिर्णोद्धार व स्वक्व:गु जिर्णोद्धार २४ दँ पा: । अथेहे न्याक्व:गु

जिर्णोद्धार व खुक्व:गु जिर्णोद्धारया अवधि खुदँ जक पा: । न्ह्यागु जुइमा: इलय् व्यलय् बाघभैरव मन्दिरया जिर्णोद्धार जुयाच्वंगु हे दु । बाघभैरव जिर्णोद्धारया इतिहासकथं थ्व जानकारी बियात:गु तसकं बांला:गु खँ ख: ।

वयां क्वय् कीर्तिपुर -गोर्खाली युद्ध (आक्रमण) धका: च्वयात:गुली जिगु मिखा वन । पहिलो - ने.सं.८८० काल पाण्डे मारिए । दोस्रो - ने.सं.८८४ सूरप्रताप शाहको आँखा फुट्यो । तेस्रो -ने.सं.८८६ (६ महिनाको नाकाबन्दी पछि, आत्मसमर्पण) मन्दिरमा रहेका हतियार युद्धमा लुटिएका गोर्खालीका हुन् । वयां क्वय् अंग्रेजी भाषां अनुवाद याना: तयात:गु दु । थ्व धयागु बाघभैरव व मन्दिर परिसर चाह्यूवइपिं विदेशीतयत जानकारी बिइत तया:त:गु जुइमा: ।

थ्व फ्लेक्स बोर्ड ब्वनावलय् जि अचम्म जुया । मेगु खँयला मखु । गोर्खालीत नापं स्वक:खुसिइ ल्वा:गु मखु आत्म समर्पण धका: च्वयात:गु खना: जिगु हंसं थाय् त्व:तल ।

जिं न्यना: वयागु, जिं इतिहास ब्वना वयागु व थीथी च्वमिपिन्सं च्वयात:गु आलेख ब्वनातयागु दु । छुकिइ हे किपूमितसें पृथ्वीनारायण शाहया सेनाया न्ह्योने आत्मसमर्पण यात धका: च्वयात:गु मदु । ब्वनागु मदु । थौं थ्व आत्मसमर्पण यात धका: गनं वल ?


किपूमित बहादुर, पृथ्वीनारायण शाहया सेनायात बहादुरीका साथ ल्वाना: निक्व तक बुकूपिं, स्वक्व:या पालय् खुला तक नाकाबन्दी याना नं बुके मफुसैलि पृथ्वीनारायण शाह नं किपूया मनूत ल्हाती कया: चान्हय् किपूया ध्वाखा चायेका दुहाँवन । न्ह्योने लाक्व मनूत मिसा, मिजं व मचा तक मधा:से क्रुरतापुर्वक स्याना ब्यूगु । मिजंत ल्वाइपिं मदया: कीर्तिलक्ष्मी मिसा जुया:नं भैरव सिंहया नामं स्वन्हु निचा गोर्खाली सेनानाप ल्वात । लिपा हतियार मदय् वं कीर्तिलक्ष्मीयात ज्वना: कुना:त:थाय् इज्जत लुटय् यायेत संबलय् थ:थ:म्हं छुरां सुयां सित तर इमिगु न्ह्योने आत्मसमर्पण मया: धका: न्यनातयागु, ब्वनागु थ्व फुक्क फय्गं ख:ला ? थथे हे गद्दर किपूमियात कया: गुंपुन्हिवलय् ख्वा:पा: पुया इमित गिजय याना वयाच्वंगु न्यनातयागु, थ्व फ्लेक्सय् च्वयात:गु आखलं जि किपूमि जुयाया गर्व, छकलं हाकुतिना बिल । जिगु

स्वाभिमानयात कुचा कुचा थलाबिल । खय्तला इतिहास त्याकूम्हेसें च्वकी, व थ:त बांमला:गु लिच्व: लाइगु गबलें च्वकी मखु । बाघभैरव मन्दिर गुठी व्यवस्थापन समितिं गनं थ्व प्रमाण हया: थथे च्वयातल ? न त विजयी सेनाया भूठ व शत्रुया गर्व नास यायेत फय्गं च्वयात:गु इतिहास न्ह्य:ने ह:गु ख:ला ? गोर्खाली सेनानाप किपूमित स्वक्व:खुसि वूगु अवश्य ख: । उगु इलय् हे गोर खाली सेनां किपूमितयगु न्हाय् ध्यंगु धइगु खँ दु । तर आत्मसमर्पण या:गु धइगु थौंतक न्यने मलंनीगु न्हापां खुसी थ:थाय् हे लिखित रुपं ब्वनेमाला: जि अजूचाया । पलख जि ला वाताहाँ जुया ।

थ्व खँ स्वयेबलय् छुं खँ मदु धइथें जुइफु । सार्वजनिक थासय् थथे मखुगु खँ तया: किपूमितसें आत्मसमर्पण यात धका: तयातयेबलय् स्वाभिमान किपूमितयगु इज्जत विश्वया न्ह्य:ने क्वतुंवनी । पृथ्वी नारायण शाहनं स्वनिग: त्याकेधुंका: थनया यक्व अभिलेख, ग्रन्थत गुलिं छवयेका बिल, गुलिं बागमती चुइका: नस्ट यात धइगु भीसं न्यनातयागु हे दु । थुज्व:पिन्सं च्वयात:गु इतिहासयात आधार दयेका थथे थ:गु इज्जत वनीगु खँ च्वयेमज्यूगु ख: ।

थ्वहे खँयात कया: जिं बाघभैरव मन्दिर गुठी व्यवस्थापन समितिया नाय: शुद्ध महर्जनयाके न्यना । वय्कलं आत्मसमर्पण या:गु ला ख:नि । अथेजुया च्वयातयागु धयादिल ।

अनं किपुली लैय् नापलापिं मेपिं यक्व किपूमितय्के न्यना: सुनां हे किपूमितसें गोरखाली सेनाया न्ह्योने आत्मसमर्पण या:गु ख: धका: मधा: । पृथ्वीनारायण शाह नं अन्यायपूर्वक किपूमितयत त्याकूगुलिं अफतक शाह जुजुपिं बाघभैरव स्थानय् वयेमदु याना:त:गु ख: । पृथ्वीनारायण शाहयात छ्याक: ल्वहँतय् थ्यनकि थुकलं बिइगु याना वयाच्वंगु दु । नेपा:या पुरातात्विक, सांस्कृतिक अले शिलालेख अध्ययन याना: थुकिया बारे लेख, सफूत च्वयाच्वनादीपिं प्रयाग मान प्रधान व जीवन कुमार महर्जनपिं लिसे थ्वहे खँय् न्यनेकने याना । वय्क:पिनि धापूकथं थ्व सरासर भूठ ख: । थ्व किपूमितयगु स्वाभिमान नाप स्वा:गु खँ जुया: थ्व फ्लेक्स बोर्डय् आत्मसमर्पण च्वयात:गु खँव: लिकायेत सम्बन्धितपिके इनाप यानाच्वना । मखुसा आधिकारीक प्रमाणसहित स्पष्टिकरण बीमाल ।



नेवा: न्ह्यलुवा: पद्मरत्न तुलाधरयात नेवा: अधिकार सिरपा: ल:ल्हात

नगां ज्ञानमालाया न्हापांगु पिथना “अनमोल रत्न”



- ललेन्द्र शाक्य -

नेवा:लिसें देसया मुक्कं आदिवासी जनजातिया अधिकार प्राप्तिया आन्दोलनय् दशकौनिसें आ:तक न्ह्यलुवा: जुया: भूमिका म्हितादीम्ह राजनीतिज्ञ, मानव अधिकारवादी नेता, साहित्यकार, पत्रकार, नेपालभाषा आन्दोलनया प्रणेता, २०४६ सालया बहुदलीय व्यवस्था पलिस्था यायेगु नितिं आन्दोलनया न्ह्यलुवा: व उगु आन्दोलनया सूत्रधारलिसें गणतन्त्र आन्दोलनया प्रणेता, बहुआयामिक बहुप्रतिभाशाली राष्ट्रभक्त स्वाभिमानी निर्भिक जनपक्षीय नेवा: न्ह्यलुवा: भाजु पद्मरत्न तुलाधरयात थुथु दँया नेवा: अधिकार सिरपा: ल:ल्हात ।

यँया खुसिबुई च्वंगु नेपा: व्यांक्वेटय् म्हिग: शनिवा: जूगु

उगु ज्याभव: नेवा: अधिकार सिरपा: गुथिया नाय: डा. महेशमान श्रेष्ठया सभानाय:सुइ न्ह्या:गु ख: ।

ज्याभवलय् नेवा: अधिकार सिरपा:या संरक्षक मोहनी श्रेष्ठलिसें विशेष पाहाँकथं भायादीम्ह जनकवि दुर्गालाल श्रेष्ठ, प्रा. माणिकलाल श्रेष्ठ, बरिष्ठ संगीतक:मि भृगुराम श्रेष्ठ, नेवा: न्ह्यलुवा:पिं मल्ल. के. सुन्दर, राजेन्द्र श्रेष्ठ, तीर्थराम डंगोललिसें थीथी हनेवह:पिन्सं दबुली आसन ग्रहण यानादीगु ख: । नेवा: न्ह्यलुवा:लिसें नेवा: अधिकार सिरपा: गुथिया ग्वाहालिमि मल्ल के. सुन्दर नेवा: अधिकार सिरपा:पाखें सम्मानित व्यक्तित्व भाजु तुलाधरया जीवनीयात कया वय्क:या

म्हसीका न्ह्यव्वयादीगु ख:सा विशेष पाहाँकथं भायादीम्ह जनकवि दुर्गालाल श्रेष्ठ सकलसिगु पाखें भाजु तुलाधर यात भिंतुना देछानादीगु ख: ।

अथेहे, सिरपा: ल:ल्हायेगु भवलय् नेवा: अधिकार सिरपा:या संरक्षक मयजु मोहनी श्रेष्ठ भाजु तुलाधरयात हनापौ देछानादीगु ख:सा गुथिया नाय: डा. महेशमान श्रेष्ठ उगु सिरपा: दुने दुथ्या:गु स्वीन्याद्र: तका (३५,०००) दांया चेक ल:ल्हानादीगु ख: । ज्याभवलय् थीथी व्यक्तित्वपिं पाखें सिरपा: कयादीम्ह भाजु पद्मरत्न तुलाधर यात खादा न्ययेका: हनादीगु ख: । ज्याभवलय् सिरपा: ल:ल्हाना: कायेधुंका: भाजु तुलाधर थ:गु जीवनया अविष्मरणीय लुमंगु खं

व घटनात न्यंकादीगु ख:सा आ: नेवा:त थ:गु अधिकारया नितिं आन्दोलनय् क्वाहां वनेत यक्व लिपा लायेधुंकूगु खं न्ह्यथंसें वय्कलं आ: याकनं हे नेवा:तसें थ:गु अधिकारया नितिं निर्णायक आन्दोलन यायेमा:गु खँय् ब: वियादिल ।

नुग:खँ तयेगु भवलय् भाजु तुलाधर थीथी जनजातिपिन्सं नेवा:त मदकं छुं नं आन्दोलन ता:लाइमखु धका: धाइगु खँ धयादिसें आ: नं नेवा:त आन्दोलनय् निर्णायक भूमिका म्हितेत दनेमा:गु खँ कनादिल ।

नेवा: जागरण मञ्चया नाय: व नेवा: अधिकार सिरपा: गुथि ग्वाहालि पुच:या दुज: सुजीव बज्राचार्य न्ह्याकादीगु उगु सिरपा: ल:ल्हायेगु ज्याभवलय् गुथिया दुज: डा. मनोजमान श्रेष्ठ सुभाय् देछानादीगु ख:सा उगु ज्याभवलय् आपालं आपा: थीथी ख्य:या व्यक्तित्वपिनिगु उपस्थिति दूगु ख: । थुगु सिरपा: ल:ल्हायेगु ज्याभव: स्वक्व:गु ख:सा थ्वयां न्ह्य: नेवा: स्वायत्त राज्य मंका: संघर्ष समितियात ल:ल्हा:गु ख:सा वधुंका: विराट नेपालभाषा साहित्य गुथियात ल:ल्हा:गु ख: । अथेहे, वंगु दँ त:भुखाय् व्व:गुलिं सुयात नं थुगु सिरपा: ल:ल्हा:गु ख:सा आ: थुगुक खुसिइ नेवा: न्ह्यलुवा: भाजु पद्मरत्न तुलाधर यात ल:ल्हा:गु ख: ।



नगां ज्ञानमाला भजन खल: नगांया न्हापांगु पिथना ज्ञानमाा भजन संग्रह “अनमोल रत्न” म्येचा जनकवि दुर्गालाल श्रेष्ठ चिखिप्यना दिल ।

नगां ज्ञानमाला भजन खल:या निवर्तमान नाय: धनवहादुर महर्जनया सभा नायोसुइ म्हिग: जेठ १ गते सनिवा: नगामय्च्वंगु बाघभैरव बैक्वेटय् जूगु ज्याभवलय् मूपाहाँ जनकवि दुर्गालाल श्रेष्ठ त्वार वालय् मत च्याका: म्येचाया चिखिप्यना: उलेज्या यानादीगु ख: । उगु ज्याभवलय् पाहाँकथं गणमहाविहारया प्रमुख भिक्षु शोभित महास्थविर, नेपाल राष्ट्रिय ज्ञानमाला समितिया नाय: किरण कुमार जोशी, रमानाथ श्रेष्ठ (निवर्तमान अध्यक्ष, नेपाल सिलाई तथा कपडा व्यवसायी संघ), वरिष्ठ गायिका रमना श्रेष्ठ व संगीतकार संतोष महर्जन भायादीगु ख: । नगां ज्ञानमाला भजन खल:या सचिव बेखाराम महर्जन लसकुस न्वचु वियादीगु ख:सा संगीतया समिक्षा वरिष्ठ गायिका रमना श्रेष्ठ यानादीगु ख: ।

नगांया सन्तोष महर्जनया याक: संगीतय् पिदंगु उगु म्येचालय् दुगु म्येत नं हाल: न्यंकूगु ख: । मूपाहाँ जनकवि दुर्गालाल श्रेष्ठ म्येचा:या संगीतकार सन्तोष महर्जन व म्येहालामिपिन्त मतिनाया चिं ल:ल्हानादीगु ख: । उगु ज्याभवलय् पाहाँपिं किरणकुमार जोशी, रमानाथ श्रेष्ठ व मूपाहाँपिन्सं थ:थ:गु नुग: खँ

अथेहे, ज्याभवलय् नेपाल राष्ट्रिय ज्ञानमाला समितिया नाय: किरणकुमार जोशी, नेपाल सिलाई तथा कपडा व्यवसायी संघया निवर्तमान नाय: रमानाथ श्रेष्ठपिन्सं नुग:खँ तयादीगु ख:सा मूपाहाँ जनकवि दुर्गालाल श्रेष्ठ नं थ:गु नुग:खँ तयादीगु ख: । अथे हे संगीतकार सन्तोष महर्जन नं नुग: खँ तयादीगु ख:सा भिमसेन दास श्रेष्ठ सुभाय् न्वचु वियादीगु ख: । ज्याभव: गायिका रीता महर्जन न्ह्याकूगु ख: ।

समाज रूपान्तरणया नितिं
महत्त्वपूर्णगु भूमिका म्हितीपिं पत्रकार !

पत्रकार जुइगु छिगु चाहाना
छित पत्रकार यायेगु जिमिगु योजना
नेपालमण्डल टेलिभिजनया पत्रकार जुइगु ख:सा
जिमित स्वापू तयादिसँ ।

जिमित मा:गु दु

- रिपोर्टर - न्याम्ह
- क्यामरा पर्सन - निम्ह
- समाचार ब्बनीपिं - स्वम्ह
- मास्टर कन्ट्रोल रूम अपरेटर - निम्ह



स्वापू तयेगु न्हि: नेपाल संवत् ११३६
बछलाख नव:मि आइतवा:निसें बछलागा पारु
आइतव तक (२०७३ जेठ २ गतेनिसें जेठ ९
गते तक)

स्वापू तयेगु थाय्
नेपालमण्डल टेलिभिजन
प्या: पुखू, यल, फोन नं. ५५२७५०१

एकल जातिया सत्ताविरुद्ध ल्वाना: न्याय व अधिकार कायेगु लँपुइ न्ह्यज्यां वनेनु' – सिजन श्रेष्ठ

(सिजन श्रेष्ठ, थौकन्ह्य अमेरिकाया बाल्टिमोर चवना: चवनादीगु दु । वय्कल अमेरिकाया टाभल एजेन्सी व हाण्डक्राफ्टया व्यापार यानाचवनादीगु दु । भाजु सिजन श्रेष्ठ आ: नकतिनि जक अमेरिकाया बाल्टिमोर क्वचा:गु निक्क:गु हलिं नेवा: गुथिया अधिवेशनं नाय: पदय् निर्वाचित जुयादीगु ख: । वय्क: भाजु श्रेष्ठलिसे नेवा: अनलाइनन्युजया नितिं गंगाबहादुर नेम्कुल हलिं नेवा: गुथिया विषयस व थीथी विषयस यानादीगु खँल्हाबल्हाया सारसंक्षेप थन न्ह्यब्वया चवना: सं.)

सिजन जु, छि निक्क:गु हलिं दबूया नाय: जुयादिल, धयादिसँ छिगु कार्ययोजना छु छु दु ?

- जिगु न्हापांगु योजना हलिं गुथिया थीथी पदया नितिं योग्य व्यक्तिपिं नियुक्ति यायेगु ख: । थुगु गुथिइ २७ म्ह दुज:पिं दुथ्याइ । थौतक ७ म्ह जक पदपूर्ति जूगु दु । गुकी नाय: जि स्वयं हे जुल । अले मेपिं सिनियर न्वकू दयारत्न शाक्य, डा. नारायण राजभण्डारीलिसं न्वकू स्वयम्भु तुलाधर, म्छ्याञ्जे सुभाषराम प्रजापति, जनसम्पर्क अधिकृत कृष्ण चर्खु व दुज: राजीष श्रेष्ठ चवनादीगु दु । मेपिं २० म्ह थीथी देय्या नेपालभाषा व संस्कृतिइ योगदान बियाचर्खिं व्यक्तिपिं ल्यया: २७ गू पद पूर्वके ल्यंदनि ।

ल्यं दनिगु २० गू पदय् युवावर्गपिन्त गुज्व:गु व गुकथं थाय् बिइगु विचा: यानादियागु दु ?

थ्व आन्दोलन आवश्यक ख: । भौ नेपा:मिपिन्सं थ:गु सांस्कृतिक अधिकार, भाषिक अधिकार गुमे जूगु थौंसिबें २४५ दँ दये धुंकल । गुगु गोरखा विस्तार यायेगु इलय् जूगु ख: । आ: व अधिकार लित कायेगु दिं लिक्क लिक्क वयाच्वंगु दु । थुगु इलय् नं भौ सकल पहिचानधर नेपा:मिपिं छप्पं छधी जुया: अधिकार काये मफुत धा:सा लिपा गुवलें नं उगु अधिकार काये खनीमखु । उकिं सकल पहिचान वादी नेपा:मिपिन्त जिं इनाप याये कि भौपिं छप्पं छधी जुया: एकल जातिया सत्ताविरुद्ध ल्वाना: न्याय व अधिकार कायेगु लँपुइ न्ह्यज्यां वनेनु ।

- हलिं गुथिया लक्ष्य धैगु

हे युवावर्गपिन्त न्ह्य:ने हया: ज्या याकेगु ख: । आ: थुगु गुथिइ युवावर्गपिन्त दुथ्याका: मा:गु तालिम बिया: उपिं युवापिन्त योग्य व दक्ष याना: थुगु गुथिं पला: छीगु लक्ष्य तयागु दु ।

सिजन जु, छिं धयादिल युवापिन्त योग्य यायेगु धका:, युवावर्गया भविष्यया नितिं हलिं गुथिं गुज्व:गु अवसर बिइगु योजना दु ?

-हलिं गुथिं युवापिन्त नेपालभाषा, नेवा: संस्कार ल्यकेत व विश्व न्यंक प्रवर्द्धन यायेत लिसं युवापिनिगु व्यक्तित्व विकास याकेगु सामाजिक ज्याय् साथ बिइत न्ह्यज्याकेगु व छुं युवा पुचलं नेपालभाषाया नितिं ज्या यायेगु मंदुपिन्त ग्वाहालि यायेगु व भाषा साहित्य कला क्षेत्रय् ज्या याइपिन्त नं गुथिं ग्वाहालि यायेगु जुइ । जि थुगु नेवा: अनलाइनन्युजपाखें थ्व नं धाये कि गुगु युवा पुचलं भाषा साहित्ययात ग्वाहालि जुइगु सर्त मुभी, कार्टून प्रोग्राम विश्व न्यंक छक्कल याये फइगु



सिजन श्रेष्ठ, नाय: हलिं नेवा: गुथि

मनोरञ्जनात्मक ज्याभवःत दुसा थ:गु देसय् च्वंगु गुथियात जानकारी बियादिसँ, हलिं गुथिं फक्क ग्वाहालि यायेगु कुत: याये ।
थुलि बांला:गु सोचया लिसं व:गु हलिं गुथिया निक्क:गु अधिवेशनय् सुनां सुनां सहभागिता क्यन ?

- निक्क:गु अधिवेशनय् १३ गूसिबें अप्ठ: देसया थ्यंमथ्यं ५५० म्ह मनूतसं ब्वति का:गु दु । उकी हलिं गुथिया फुक्क दुज:पिं दुथ्या:गु ख: । उकी डाक्टर, इन्जिनीयर, वैज्ञानिक नापं नेपा:पाखें भ्यायादीपिं फुक्क राजनीतिक पार्टीया नेतात तकं दुथ्या: । नेपा:या हनेबह:पिं व्यक्तिपिनिगु नां कायेगु ख:सा संघीय समाजवादी फोरम नेपालया सह-अध्यक्ष राजेन्द्र श्रेष्ठ, नेवा: न्ह्यलुवा: मल्ल के. सुन्दर, गोरखापत्रया प्रधानसम्पादक व हलिं गुथि नेपा: च्याप्टरया नाय: पुष्कर माथेमा, राष्ट्रपा नेपालया वनेनु । सुभाय् ।

राजाराम श्रेष्ठलिसं थीथी व्यक्तित्वपिं ख: ।
दकले लिपा, हलिं गुथ व छिगु व्यक्तिगतपाखें नेपालय् जुयाच्वंगु पहिचानया नितिं आन्दोलनयात गुकथं स्वयादिया ?

-जिगु विचालय् थ्व आन्दोलन आवश्यक ख: । भौ नेपा:मिपिन्सं थ:गु सांस्कृतिक अधिकार, भाषिक अधिकार गुमे जूगु थौंसिबें २४५ दँ दये धुंकल । गुगु गोरखा विस्तार यायेगु इलय् जूगु ख: । आ: व अधिकार लित कायेगु दिं लिक्क लिक्क वयाच्वंगु दु । थुगु इलय् नं भौ सकल पहिचानधर नेपा:मिपिं छप्पं छधी जुया: अधिकार काये मफुत धा:सा लिपा गुवलें नं उगु अधिकार काये खनीमखु । उकिं सकल पहिचान वादी नेपा:मिपिन्त जिं इनाप याये कि भौपिं छप्पं छधी जुया: एकल जातिया सत्ताविरुद्ध ल्वाना: न्याय व अधिकार कायेगु लँपुइ न्ह्यज्यां वनेनु । सुभाय् ।

साहित्य/चिनाखं

प्यन्हु म्वायेत मखुगु कर्म छाया यायेगु



कवि राम महर्जन,
नगां, किपू-१६

मिहग: जि अचानकं थारा न्हुल

ऐ बाज्य धका सतूगु ताबले

जि बुरा हे जूगु ख:ला धका

काचां काचां न्हायकं स्व: वना ॥

जिगु ख्वालय् च्वंगु ला स्यस्य

कुने धुंकल खनी अले छाया

मघाई जित बाज्या धका:

बुरा: जुई धुंकुमसित बाज्या धालं छु ॥

जि मचाबले पाली लाकां मदय्क

चिकुलां माघ हा: वनागु ख:

न्हिथं यें थ्यंक वना आख: ब्वं

वनागु ख: व नं न्यासि वना ॥

जि पाँच सालं जन्म जुया

थौं त्रिहतर साल थ्यने धुंकल

भण्डै बृद्ध भत्ताया अवस्थाय् थ्यने

त्योम्ह जि बुरा जूगुला चाहे मचा ॥

अथे जुया धैत:गु ज्वीमा

ज्वना वनेगु छुं मदु

न्ह्याको द:सां त्वता हे वने मानी धा:सा

प्यन्हु म्वाय् मखुगु कर्म छाया यायेगु ?

थौं बुराया अवस्थाय् थ्यंबलय् जि

न्हापाया खँ जीत लुमसे बल

गुलि दु:ख सुखया अवस्था भोगेयाये धुन

मिहग:या जीवन व थौया जीवन ॥


आकाश व जमीन थें फरक ताल

समय नं भीत गुखे यंकल उखे

भौपिं मवसे मगा: अथे धया

भाग्या भरे मखु भाग्ययात काय नं सय्के मा:थें

किपूया गथु प्याखं
(गं मखा:गु प्याखं)



श्रीकृष्ण महर्जन

किपूया गथु प्याखं (गं मखा:गु प्याखं)

सफू बजारय् पिदने धुंकूगु दु थ:गु प्रति सुरक्षित यानादिसँ

सफू दइगु थाय्

- १) खपया च्याम्हसिंहया स्टेशनरी पस: (श्याम सुन्दरया पस:)
- २) खप कमल विनायकया स्टेशनरी पस:
- ३) किपूया सत:क्वया स्टेशनरी पस:
- ४) किपूया देय् पुगूया बाघभैरव स्टेशनरी पस:
- ५) किपूया पांगा दोवाटोया किपू बूक प्वाइट
- ६) येंया भोताहिंति नातिबज्रया पस:
- ७) येंया कुलाभुलिइ च्वंगु मंका: धुकू पस:
- ८) यल, यल ध्वाखा अर्जुन स्टेशनरी पस:
- ९) स्वापू नितिं मेमेगु फोन नम्बर: ४३३४०१३, ९८४१७५२५८३, ९८४६०४६१२३९

मू

सच्छि तका जक (१००/-)

सफुतिइ दुने

१) गथु समुदायया इतिहासनिसें वर्तमान तक

२) गथु प्याखनय् दुथ्यानाच्वंगु तान्त्रिक व बैदिक दर्शन

३) नास: झ:यात किसिलिं छाया तइगु ख: ?

४) किपूया गथु प्याखनय् दुथ्यानाच्वंगु थीथी पक्ष

५) गथु प्याखंया थीथी नां

६) किपूया ख्वा:पा: प्याखं मध्ये गथु प्याखं नापं मेमेगु

अन्धविश्वासय् लिकुनाच्चंगु विज्ञान



(नेवा:तय्सं न्हापानिसं थथे याये मत्यः अथे याये मत्यः धका: धया वयाच्चंगु दु। थौ वया उक्रियात अन्धविश्वास धायेगु या:। याये मत्यः धयातःगुया धीधी कार णत दु। उगु कारणायात कुला स्वयेगु ज्या यात धा:सा अन दुने विज्ञान दु। उकिं पन्नारत्न महर्जनं अज्व:गु हे अन्धविश्वासय् लिकुनाच्चंगु विज्ञानयात कया सफू हे च्यादीगु दु। सं)

थी मज्यू जूपिं मिसातय्त छय अलग तइ ?

भीगु समाजय मिसापिनि थीमज्यू जुइगुयात कया: यक्व कथंया चर्चा यायेगु या:। पुजा पाठय् वने मखंक थीमज्यू जुल धायेवं पापि धायेगु याइ। शुभ ज्या यायेबलय् थीमज्यू जुल कि अलछिन धायेगु या:। थथ कं खिनेगु ज्याय् धा:सा मिसापिं हे न्हय:ने लाइ। थ्व छगू प्राकृतिक संरचना ख: धयागु विचा: याये मफुगुया हुनिं ख:, अशिक्षा व अज्ञानताया उपज ख:।

मिसातय् थीमज्यू जुइगु विषययात कया: छम्ह अनुभवि मिसां धा:कथं थ्व अवस्था धयागु तसकं संवेदनशील अवस्था ख:। थ्व अवस्थाय् इमिगु दुनेया अंगत न्हापा न्हापा सिकं यक्व क्रियाशील जुइ। थ्व क्रिया धा:सा इमिसं नं वा: मचाये य:। यक्व क्रियाशील जूगु अंग याकनं न्यली। थज्या:गु अवस्थाय् इमि वाट्य (पिने) रुपं स्फूर्ति खनेद:सां दुनेदुने यक्व कमजोर जुइ।

ख्वालय् न्हूगु चमक खनेदइ। अथे जूसां आकलभुकल ख्वा:या रुप लक्षण पलभर जक जूसां हिलावनेगु याइ। थ्व धयागु थीमज्यू जुइबलय् सुक्ष्म रुपं खनेदइगु कमजोरी ख:। थ्व अवस्था हे संवेदनशीलताया उच्च अवस्था ख:। थज्या:गु अवस्थाय् छुं नं भ्यातु क्यातुया ज्या यायेगु पा:लात धायेवं इमिगु शर रिरय् दीर्घकालीन असर लायेफु। उकें हे थी मज्यू जुइगु वखतय् ल्व:मांया मचा छगू हे ल्हवने मज्यु धयात:गु ख:। थज्यागु हुनिं थीमज्यू जूपिं मिसातय्त छुं नं मथीकुसे वा छुं नं ज्या मयाकुसे थी मत्य: धका: अलग तयात:गु ख:।

मिसातय् थी मज्यू जुइबलय् संवेदनशील अवस्था धयागु १०० निसं १५० घौ (घण्टा) तक जुइ। थुकी नं १०० घौ तसकं संवेदनशील ख:। उकिं थ्व अवधिभर आराम यायेकथं थी मत्य: धका: छखे लिकातइगु ख:।

मिसातय् थीमज्यू जुइबलय् इमिगु म्हं फोहरयालिसं छगू कथंया सुक्ष्म गन्ध वइ। थ्व गन्ध लगातार वयातुं च्वनी

मखु। आकल भुकल वयेगु याइ। गबले वइ धका: नं धाये फइमखु। थज्या:गु गन्ध पुजा सगुन आदि थासय् नकारात्मक प्रभाव लाकि। पुजा सगुन धयागु यचुपिचु व नीसी याना: याइगु विधि ख:। थी मज्यू जूपिं मिस्त शार रिरकरुपं यचुपिचु जुइमखु।

थीमज्यू जूपिं मिस्तय्त स्वां सिसाफुसामा आदि दुथासय् नं छवइमखु। इमिगु हाचां दाल धायेवं स्वां सिसाफुसाया वुं हावनी धयागु मान्यता दु। उकथं हे जैविकरुपं वाय् शक्तिया रुपं त्यना: व क्वाका: न्हूगु रुपय् हयेगु ज्या, जा थुइगु, अय्ला: कायेगु, प्व: हायेगु, प्वक त्यनेगु थें ज्या:गु ज्या यायेबलय् नं थीमज्यू जूपिं मिस्तय्त दुकाइ मखु। दुहां वन धा:सा गुगु रुपय् वयेमा:गु ख: वइमखु धयागु मान्यता दु। उम्ह मिसां धा:कथं थ्व नं वहे सुक्ष्म गन्धया प्रभाव जुइमा:। तर थ्व नं न्हयावले तं जुयाच्चनीगु मखु, आकलभुकलं हे जक जुइगु ख:। वातावरणय् वयाच्चनीगु मेगु गन्ध नं



पन्नारत्न महर्जन

थ्व गन्ध वइगु इलय् थीमज्यू जूपिं मिसातय्त असर लाकीगु नं छगू पक्ष दु।

थुकथं मिस्तय् थीमज्यू जुइबलय् इमिगु शरीरय् वइगु हिउपा:यात ध्यानय् तया: इमिगु जिउयात सुरक्षा यायेत हे छुं नं ज्या मयाकुसे आराम कायेकेत थीमत्य: धका: अलग तयात:गु ख:। इमित अवहेलना याना: या:गु व्यवहार मखु। थी मज्यू जूपिं मिस्तय्सं थ:थम्हंतुं क्वहेंकेगु यायेम्वा:। मेखें सामाजिक संरचनाया आर्थिक पक्षय् इमिगु पाखें छुं नं भिगु लिच्व: मलाकेगु नं छगु नीति ख:। थथे जुया: हे थीमज्यू जूपिं मिसातय्त धर्म न्हयलुइका: जूसां अन्धविश्वासय् लिकुंका: जूसां अलग तयात:गु ख:।



बुंगद्य:या रथ व जात्रा

श्रीकृष्ण महर्जन

बुंगद्य:या रथ निर्माण

स्वनिग:या आदिवासी नेवा:तय्सं अन्तया द्य: कथं नालात:म्ह बुंगद्य: ख:। बुंगद्य:या जात्रा धइगु नेपा:या दक्ले ता: हाक:गु जात्रा ख:सा दैय् दसं यलय् जक रथ साला: जात्रा याइगु ख:सा भिनिदैय् छक: धा:सा बुंगनिसं यलय् तक अले हाकनं बुंगय् यंका: क्वचायेकीगु चलन दु।

रथ निर्माण प्रक्रिया बुंगद्य:या रथ पिइगु ज्या क्वचाये धुंका: साइटय् लाका पारु कुन्हु हाम्व:कि पुजा याइगु चलन दु। बुंगद्य:या र थ थुगु थासय् लानाच्चंगु अवस्थाय् पिइगु ज्या जूगु ख: व हे थासय् हाम्व:कि पुजा यायेगु ज्या जुइ। उगु पुजायात हाम्व:कि स्वायेगु धका: नं धाइ। रथया प्यंग: थां तया पुजा याइगुयात हे हाम्व:कि स्वायेगु धाइगु ख:। अनं लिपा कन्हय् कुन्हु हे रथ दयेकेगु ज्या सुरु जुइ। रथ दयेकेगु भवलय् दक्ले न्हापां हाम्व:क्रिया लेबल मिलेयायेगु ज्या जुइ। अथे हाक्व:क्रिया लेबल मिले याये धुनेवं हे प्यचा: हे घ:चा: लिकाइ। अले रथया तं तया

वनेगु ज्या सुरु जुइ। रथया सिंयागु ज्या फुक्कं बाराहीतय्सं याइगु ख:। रथ दयेकेगु भवलय् धुरासि हाम्व:क्रिया द्य:ने तयेगु ज्या जुइ। धुरासिंयात आ:सि तयेगु धका: नं धाइ। अनंलिपा धुरासिंया द्य:ने घ:मा पासा निग: च्वनी। घ:मा पासाया द्य:ने २० ग: मेमेगु थां नं तयेगु ज्या जुइ। अले न्हय:ने व ल्यूने याना निग: मलासिं तयेगु याइ। मलासिंया द्य:ने त:ख:गु ख: तयेगु ज्या जुइ। ख: तयेगु ज्यायात ख: ग्वयेगु धका: नं धाइ। अले तूसिं प्यंग:थां, गल: थां प्यंग:, च्य:चाथां प्यंग: तयेगु याइ। अथे लिपा खुइख: धका: निगूगु ख: तयेगु अर्थात निगूगु ख: ग्वयेगु याइ। निगूगु ख:या द्य:ने मेगु च्याग: थां तइ। च्याग: थांया द्य:ने मेगु हाकनं स्वंगूगु ख: तयेगु ज्या जुइ। अले व हे ख:या प्वालं घ:मा पासा तक प्यंग: भिंखुकु हाकगु सिं तयेगु याइ। रथयात दक्ले ब:लाकेगु नितिं तइगु सिं जुइ। रथ दयेकेगु भवलय् सिं धाइ। व हे प्यंग:सिंया द्य:ने नीजनाचा धका: प्यंग: सिं च्वनी। रथ दयेकेगु ल्याखं थुगु ज्या तक थ्यनीबले बचिछ ज्या क्वचा:गु जुइ।

अनंलि पौ चिइपिं यंवातय्सं र थया क्वनिसं च्वय् थ्यंक पौ चिना हइ। थाय् थासय् गथांमुग: चिइगु जा नं याइ। अले दर्शमि कुन्हु लाका घ:चा: तयेगु ज्या जुइ। अनं लिपा जक प्यंगूगु ग्वयेगु ज्या जुइ। अले लगातर रुपं न्यागूगु, खुगूगु, न्हयगूगु, च्यागूगु जुया गुंगूगु ख: ग्वयेगु ज्या बाराहीतय्सं याइ। अथे गुंगूगु ख: ग्वयेगु ज्या क्वचायेवं हे यंवातय्सं ग्व:पौ चिना हइ। अले खिप:या तान नं तया हइ। तान तयेगु ज्या क्वचाये धुनेवं थाय् थासय् पौया गथांमुग: चिना हइ। अले यंवातय्सं भिंखुगु: ल:सिं तयेगु ज्या याइ। स्वीनिकु हाक:गु भिंखुगु: ल:सिं प्यंगु दिशाय् प्यंग: प्यंग: तइगु ख:। अनं लिपा थाय् थासय् ल:सिं चिना हइगु ख:। छगू कथं फुक्कं हे छगू धिक्का थें जुइक चिना हइगु ख:। अले हाकनं पौया जं हिनेगु ज्या जुइ। अले ग्वास बाँय्म्व: दयेका तयेगु ज्या जुइ। ग्वारा बाँय्म्व: तयेवं अनं च्वय् थाहां व:गु ल:सिंयात ध्यना छुवाइ। ग्वारा बाँय्म्व:या द्य:ने केरा बाँय्म्व: तइ। अले केरा बाँय्म्व:या द्य:ने धकि बाँय्म्व:

तइ। धकि बाँय्म्व:या द्य:ने स्वयम्भु भगवन्तया मूर्ति, लुं सियात:गु निगू ध्वाँय्, बाँय्म्व:या चाक:हिइक स्वीनग: गं तयेगु ज्या याइ। थ्व फुक्क ज्या यंवातय्सं याइगु ख:। अथे स्वीनिग: गं तयेगु ज्या क्वचायेवं रथ दयेकेगु ज्या क्वचा:गु तायेकी।

द्य: रथारोहण

बुंगद्य:या रथ मूर्ति क्वकायेत गथे साइट स्वयेमा: अथे हे मूर्तियात रथारोहण यायेत नं साइट स्वयेमा:गु चलन दु। बुंगद्य:या साइट पिकाइपिं ज्यातिषतय्सं हे साइट बिइगु ख:। अले द्य:यात रथारोहण याइगु दिनय् हे दक्ले न्हापां लुं सियात:गु भ्या:, तोर ण, क:सिम्ब:या बार, घ:मा तकं तयेगु ज्या जुइ। अले द्य:या र थय् फुक्कं तये धुंका: जक या: न्यायेकीगु ख:। बुंगद्य:या रथ दयेकेत मा:गु सिं बुंगद्य:या रथ दयेकेत मुक्कं याना न्याताजि सिं मा:। रथ दयेकेगु नितिं फुक्कसिं धइगु सुंसी ख:। थुगु सिं धइगु गोदावरीया जंगलं हइगु ख:। अथे हे घ:मा दयेकीगु सि धइगु नागवसिं ख:। थुगु सिं न्हापा जूसा तिकाभैरव लाग्नां

किपा:

रेखा शाक्यया फेसबुकपाखें



हइगु ख:सा थौकन्हय् मेमेगु थासं नं हयेगु यानाच्चंगु दु। अथे हे घ:कू नकिगु सिं धइगु नसिं ख:। थुगु सिं बुंगं हइगु ख:। अले द्य: च्वनीगु प्यंगु कुनय् च्वंगु थां धा:सा तूसिं ख:। थुगु सिं नं गोदावरीया जंगलं हे हइगु ख:। उगु हे कथं घ:चा:या नितिं मा:गुसिं धइगु न:सिं ख:। थुगु सिं धइगु मकवानपुरं हइगु ख:। थ्व न्याताजि कथंया सिं मध्ये नं अजूचाइपुगु सिं कथं घ:चा: दयेकेगु न:सिंयात हे नालात:गु दु। थुगुसिं हयेगु नितिं सिमा

ध्यनीगु इलय् मनूया हि थें हे च्वंगु ह्याउंसे च्वंगु हि पिहां वइगु ख:। अथे हे ब्याद्य:या र थ जात्रा नाप स्वापू दुगु मेगु सिं धइगु व:सिं ख:। व:सिं धइगु घ:कूया नितिं चू तइगु ख:। घ:कू नकीपिन्त हे घ:कू धका: धायेगु याना वयाच्चंगु दु। थुगु कथं बुंगद्य:या रथ दयेकेगु ज्या नाप नेवा: समाज दुने यंवा: नापं बाराहीतय्गु भुमिका स्वानाच्चंगु दुसा जात्राया भवलय् घ:कू नकेगु ज्या घ:कूतय्सं हे याइगु ख:।

नेपालमण्डल टेलिभिजन आ: २४ सै घण्टा प्रसारण

नेवा:तयगु टेलिभिजन कथं म्हस्यूगु नेवा: समाजय् तसकं ल्व:कं हवाना वयाच्वंगु नेपालमण्डल टेलिभिजन न्हिच्छि चच्छि मदिकक स्वयादीफइगु जूगु दु । छुं दिं न्ह्य:तक न्हियान्हिथं १८ घण्टा जक प्रसारण याना वयाच्वंगु नेपालमण्डल टेलिभिजन वंगु अक्षय तृतिया न्हिनिसं २४ सै घण्टा प्रसारण जूगु दु ।

नेवा: समुदायपाखें संचालन जुयाच्वंगु न्हापांगु टेलिभिजन नेपालमण्डल टेलिभिजनया समाचार प्रमुख श्रीकृष्ण महर्जनं ज्वजलपा वा:पौयात थुगु खंया जानकारी बियादिसं नेवा: टेलिभिजन कथं म्हसीयाच्वंगु नेपालमण्डल टेलिभिजनय् नेपालमण्डल समाचार निदं न्ह्य:निसं प्रसारण जुया वयाच्वंगु ख:सा वंगु वैशाख ११ गते लोकतन्त्र दिवसया निर्निसं सुथय् ८ वजे गुड मर्निङ नेपालमण्डल धका: नेवा: भाय्या पत्रपत्रिकानिसं अनलाइनया समाचार प्रसारण याना वयाच्वंगु दु धका: समाचार प्रमुख महर्जनं धयादीगु दु ।

वय्क: महर्जनं धयादी, 'नेवा:तयगु तत्कालया घटनानिसं विषयवस्तु अले राजनीतिक विषययात कया स्थापना कालनिसं अर्थात थनि स्वदं न्ह्यवनिसें हे नेपालमण्डल दबू प्रसारण जुया वयाच्वंगु ख: । अथेहे त्वा: त्वालय् वनीगु त्वा: त्वा:या न्ह्यस:लिस:, जिगु पला:, हसना, जित: य:गु म्येनिसं नेवा: मखुसां नेवा: भाय् ल्हानादीपिलिसे अन्तरवार्ता काइगु नेवा: फल्वा ज्याभव्व: नं प्रसारण जुया वयाच्वंगु दु ।'



अथेहे टेलिफिल्मी बाखंचानिसं फय्गं तकं प्रसारण जूगु नेपालमण्डल टेलिभिजनय् सम्पदा ज्याभव्व:निसं थीथी कथंया ज्याभव्व: नं प्रसारण जुयाच्वंगु दु धका: धयादिसं नेपालमण्डल टेलिभिजनया समाचार प्रमुख महर्जनं थुगु टेलिभिजनय् विशेष याना नेवा: भाय्, संस्कृति व नेवा: सभ्यतायात प्राथमिकता बिया वयाच्वंगु खने दु धका: धयादीगु दु ।

जोकर

नाति महर्जन

द्य:चपा, पांगा

छाय्थें जित: जक जोकर धाइगु

जित: खनां सकलें न्हिला जुईगु

मिहत: वनेबले पासापिन्सं नं जित:

जोकर वल धका ख्वा: स्येंका गिजे याइगु ।

न्ह्याम्हेसं नं जित गिजेजक याईगु

नुगलं सहयाय मफया ख्वया वय्गु

छन्हु खख्वं माँयाके न्यौं वना

योमाँ छाया द सकसिन. जोकर धा:गु ।

मां नं घय् पुना चुप्पा न नं हेकल

छुयाय् पुता छंत देवं जोकर याना हल

न्ह्याय् स्वतुका मिखा दुहाँ वंका बिल

तालिम मगा:म्ह कालिगढं थें ख्वा: ज्याना

म्हयात मलोयक छ्यौं तया: हल ।

म्ह हे फय् मफय्क छ्यौं छुना हल

किसिया थें न्हाय् तया हल

म्हुतुसी त:फि याना वा न्ह्यावेका हल

म्ह स्वयेवले छ जुजु थें बाँला

छुयाय पुता छंगु ख्वा: छपा: जक बाँमलाका हल ।

ख्वा: बाँमला: धका: दु:ख मन यायेगु मखु

कत:पिन्सं गिजे यात धका: ख्वयेगु मखु

ख्वा: बाँलापिनि जक ख्वा:चोला नये दैमखु

जोकर धाल धका: दु:खी जुईमते पुता

छन्त खुँ डाका धका: बाँमला:गु धा:गु नं मखु ।

धाइपिनि म्हुतुप्वा: तिके फैमखु

जुजुयात ला ज्यानमारा धाय् बाकि तैमखु

मुखपिन्सं मयोपिन्त न्ह्यागु धायेत बाकि तैमखु

छाय् ख्वयेमा:गु पुता जोकर धाल धका: छन्त

भीसं सुयागु खुया हेका नल धा:गुला मखु ।

न्ह्याम्हसं न्ह्या:गु धासा छ हेराथें च्वंम्ह

बुढी जुईवले तुतां जुया जित सहारा बिम्ह

जिगु कुल थामय् यायत जन्म जूम्ह

कतपिन्सं जोकर धा:सां नोकर धा:सां

जि मांया मिखाय्ला छ द्यो थें बाँला:म्ह

कतकिया खँ न्यना नुग: ख्वय्के मते

तँ म्वयेका सुया नाप ल्वाना जुइमते

जोकर धाल धका: चित्त दुखे यायेमते

जोकर धाइपिं नं त:धूपिं कलाकार ख:

थ:त थ:म्हं चिधंका स्वयेमते ।

मांया खँ न्यना जि ख्वय्गु दिना

ख्वावि हुहुं न्ह्याय्कें न्ह्योने वना

दंग जुल जि न्ह्याय्कने थ:गु ख्वा: खना

थ:गु ख्वा: खँ खँ हे न्हीले मास्तिवल

जिला कितावय् खीपिं जोकर थें च्वना ।

न्ह्याय् फो तफो मिखा दुहावै

म्हुतुसी त:फि किसिया थें न्हाय्फँ

वा न्ह्यां व: न्यता दुहां वँ

जित ला पिने वने हे मछाला वल

छुयाय छुयाय जुल जित थ:गु ख्वा: लुमंलुमं ।

आ: नुग: मछिंका च्वना नं छुँ जुईमखुत

मछाला पिहां मवसां छुँ याना नयफैमखुत

स्व:तूगु न्हाय् तपेनिगु खहे मखुत

दुहांवंगु मिखा तफिगु म्हुतुसी, वान्ह्यां व:गु

सुनानं मिले याना बाँलाके फैमखुत

मछा: मजूसे पासापिन्थाय् मिहत वनेगु याना हया

मां नं धाथें सकसिया येय्क खँल्हाना न्हिका जुया

बुलुहुँ बुलुहुँ जित गिजे यायगु त्व:ता हल

सकसिनं सानु तताजुया काय जोकर चा धका: सियावल ।

मचातय् जन्म दिंबलय् सत: वई

ह्याउँगु वार्जंगु लँ फिका प्याखँ हुइका तई

जि प्याखँ हुगु स्वया मचात ले ले ताताँ

जिगु ल्हा: ज्वना प्याखँ हु वई ।

मचातय् नाप प्याखँ हुहुँ त:धिक जुल

आ:ला इहिपा या भ्वय्लय् स:ता प्याखँ हुइकल

भ्वय् व:पिन्त मनोरंजन याकेत जित

दम तया: प्याखँ हुइम्ह जोकर थें याना बिल

द्वलंढ: दाँ बिया साहुतसं दम त वैगु

च:ति ना: ना: वय्क प्याखँ हुइकीगु

त्यानु थाक् धाय नं दुगु हे मखु

थ्वँकापिन्संला प्वा: स्यात कपा स्यात धा:सां

सातु साला येंका प्याखँ हुइका तैगु

म्ह स्यू म्हमस्यूपिं सकसिनं जोकर धाइगु

जिगु नां मकासे जोकर धका स:तीगु ।

न्हापा जोकर धका: ख्वा:ज्याना गिजेयाइगु

आ:ला वं वंथाय् जोकर धका: जक स:ता

नां नं ज्या नं जोकर यागु हे याका चोंगु

आ:जि मेगु ज्या मयासे जोकर हे जुइगु मतिं यना

न्ह्याक न्ह्योने दना यायथें ख्वा: ज्याय सय्का च्वना

गुंपुन्ही, कृष्णास्तमी बलय् ख्या:ल: वना

थुगु दु:ख सुचुका नुग: लू लू ख्वा:सां

कत:पिन्त न्हीकेगु स्वया च्वना ।

जोकर त न्ह्यावलें न्ह्यू ख्वा: तयाजुई

नुग: इमि यक्व ख्वा:सां सहयाना जुई

थ:गु धा सुचुका ख्वावि त्वना सां

प्याखँ हुया सकसितं न्हीका जुई ॥

तपाईको टोलमा भएका घटना कीर्तिपुरको समाचार बनाउने
हो भने तपाई एक कल फोन गर्नुस् हामी तपाईको टोलको
समाचार कीर्तिपुरको समाचार बनाईदिनेछौं

कीर्तिपुरको
चित्रण



किपुलिं पिदनाच्वंगु कीर्तिपुर सन्देश वा:पौ व ज्वज्वलपा: वा:पौया ग्राहक जुइगु नितिं स्वापू तयादिसँ

कार्यालय: निखासी टोल: कीर्तिपुर नपा-३
फोन नं.: ४३३३००७, ९८४१४०१०७७

ज्वजलपा वा:पतिइ छिगू चिनाखँ/बाखं/हाइकू विज्ञापन
व मेमेगु च्वसू पिथनेगु जूसा जिमित स्वापू तयादिसँ

सकलसिगु मंका: स:



ज्वजलपा वा:पौ

ज्याकू: निखासी त्वा: किपू नपा-३ फोन ल्या: ४३३३००७,
९८०८६२६४२० ई-मेल : kirtipur_sandesh@live.com